

يا غريب الغاضرية يمولاى للحشر هذي العزية يمولاى
احنا انصارك نطلب ابثارك

نهواك وما يحله الهوى إلا على أعتابك
واحنه دخلنه امحبتك من أوسع أبوابك

وصيحة فخر صحنه يالحبه جننه

نهواك وكل لحظه تمر بيها يمر ذكرك
يالحيرت كل الخلك يا سيدي بأمرك

يحسين يالغالي من أول وتالي

انته القداسه البيه شـرع الباري يتنور
وانت الكرامه القدمتها دامي وامعفر
انت مثال العبقريه يا أبو الأكبر
صوتك يظل نبراس ضد الزيغ والمنكر

يسـطع هلوجود	ابنورك يبو الأكبر
ابكل لحظه موجود	وبركانك تفجر
من مثلك ايجود	وايقدم المنحر
اتقدم قرابين	لجل الله أكبر

ينبراس الهدايه	تظل مرفوعه رايه	على أهل الغوايه ابمر لزمان
أبد ما يمحي ذكرك	وأبد ما يموت أمرك	وصوتك للعداله ايثور بركان
حسين ابكل قضيه	رسايل نينويه	ثبات وموقف وشجاعة وإيمان
حسين اليملاك أنصار	تفدي ابكل لعمار	أبد ما تهزمه زمرة الشيطان

يا غريب الغاضرية يمولاى للحشر هذي العزبة يمولاى
احنا انصارك نطلب ابثارك

زينب على التل اوقفت واتنادي يا مظلوم
محتاره ما بين العده وهجمت عليه القوم

لخيام حركوها وأطفال سحگوها

إن كنت حيا فأجب زينب ينور العين
أيتام عندي امطشره وامحيره يحسين

وسكينه ضربوها وليتام سلبوها

كلکم يخوتي اعله الترب هالساع عفتوني
عالضيم ماني امعوده يخواني تدروني
شمر الخنا ابسوطه اجاني ورم امتوني
كلما نخيت أحبابي عدوانك يشتموني

گلها يزينب	آنه ابساعه انزاع
وحالي يخيه	جسمي اموزع اوزاع
وخيول أميه	مني اسحگت لضاع
خدرچ يزينب	يا وسفه الخدر ضاع

انكتب يختي تضيعين	بلا عباس واحسين	وكل أهلچ على الغبره مطاعين
بعد يا أم لحزان	تشوفي راسي بالزان	وشمر يتشفه لو شافچ تنوحين
كفيله انتي تصيرين	وعلى الهزل تروحين	وبعد عيني تطبين الدواوين
في عين الله يحرّه	بلاءه وهذا وأمره	اليچ الباري في درب السبا يعين

يا غريب الغاضرية يمولاى للحشر هذي العزية يمولاى
احنا انصارك نطلب ابثارك

ودي أوصل مشهدك وأوقف على بابك
أستأذنك يا سيدي وأبجي عله امصابك

وأتمنى لو نظره مولاي في الحضرة

اوگف على باب الضريح أتنفس أنفاسك
وأنظر ابعيني المذبك ويلهيني إحساسك

ما تنطفي الجمرة وما تهدأ العبرة

أوصل لشباك الألم تتراجف أجدامي
مخنوگه أنفاسي ويهل من الدمع دامي
يالغالي چنها كربله مرسومه جدامي
وچني اسمعت زينب تگلك حرقوا اخيامي

أوصل ضريحك	ومني امجرحه العين
دمعي المصابك	يجري ابخدي نهرين
آه يا حبيبي	گلبي انشطر شطرين
أصرخ وأنادي	وا ويلي عله احسين

أشم عطرك يغالي	وضوا المرقد يلاي	ونسومات التهب تلتهب بيه
أتنفس هواكم	وأنا ابگلبي ولاكم	وأبد ما أنسى جرح الغاضرية
أحس أنه ابطيوفك	اخذني من ضيوفك	واقبلني ابخدمتك للمنيه
ملك عقلي ملكته	وگلبي نبضه انته	يروح الروح انته والهوية